

Ebe onodode ni iPolu o keke ghi ITimoti

¹ Mhemhe iPolu aghiusomhi na kepe oyi iJesu iKirisiti, rote omheshe oyi Eshinegba ni o mie awa pfuese ali iJesu iKirisiti ni o khi irudushi oyawa.

² Mhemhe mhi keke ebe ona ghi iTimoti, ni o khi egbegbi omimhe elemhi imiesuo, okhale ali ilelemhi ali opfomhe enayi Eshinegba e ka khi eye.*

Mhue egbhe shi ena osese egbholi egbe

³ Mhia nono ni u la eoli Efesosi abi mhi kie kpe gueye abi mhi ro lepe iMasidonia, ni u me asha gueye egbo eghuo ni e la oobo o sese osese egbholi e mu migha.

⁴ Gueye we, e tsua okhe igbaekele oyi egbo enede ali ida-echere ku-a ni o khia khi ekhako o lese roo bhale, ea ya kpaghie akanya oyi Eshinegba ni o rote irudunga bhale obo.

⁵ Emini o ze ni a ro mheshe omheshe ona khi, ni a ro guise inono, ni o rote udu no pfuase bhale le, ali oni o rote udu-onete ni o gue ogbo ezọ ali egbegbi irudunga bhale.

⁶ Egbo eghuo e she rote enana lasele, nyene egbe je ingmemhi afue.

⁷ Epe nono ni wewe e khi esese Ishi eyi iMosisi eyi Eshinegba, ama ea lese emini e ngme wekhi eri e lese emini e ri itoto ge ma gue gagaga.

⁸ Awa lese khi ushi o ti ini awa gue deba li abi awa kha li.

* **1:2** Li ze Ika 16.1

⁹ Awa leṣe khi ọa khi itobọ ẹgbọ enete a rọ shi ushi, ama itobọ ẹgbọ ni ẹẹ gbe ushi-a ali ighiatọ ali eni ẹa mhue ulishi Ẹshinegba ali ena olamhe, ali ẹgbọ ni ẹa leṣe ugamhi, ni ẹa mu ekpe ẹ na emhi eyi Ẹshinegba, ali ẹgbọ ni ẹẹ gbe itawe ali inyewe-a, ali ẹgbọ ni ẹẹ gbe ugbeli.

¹⁰ A shi ushi na ẹgbọ okia ali eni nu emose nabi wewe ali ikpotso nabi wewe ẹẹ gbhe, ali ẹgbọ ni e muno ẹgbọ ọ de, ali ẹgbọ ni ẹ lo ẹgbhue ali eni ẹẹ pfi ọtsẹ ẹgbhue, ali emhi elese ni ẹa de shi egbegbi Osese,

¹¹ ni o khi osese ni o de shi usomhi onete oni o mhọli ufumhi oyi Ẹshinegba, ni ọ mhọli ikhivose ni a rọ nga mhe obo.

Ikpemhi shi ilelemhi oyi Ẹshinegba

¹² Mhi kpemhi na iJesu iKirisiti Onomhue oyawa ni ọ ri itoto na mhe, ni ọ me khi mhi te ọ ni ọ rọ ze mhe shi akanya oyọli.

¹³ Abi o tseku khia khi ẹghẹghe ni o doṣe khi mhi pfi unu-a deba Ẹshinegba, ali ni mhi i jili ẹgbọ ni e miesuo, ni mhi nu we khọli, ọọ mhọli ilelemhi na mhe irari khi umhalese ali umha miesuo o remhe li ghọ.†

¹⁴ Onomhue oyawa ọ ya tutu okhale ku mhe. Ọ ri irudunga ali inono na mhe ni e khi eyawa irari ikugbe ni awa ali iJesu iKirisiti awa kugbe.

¹⁵ Egbegbi ungmehi na, ni awa kha mie shi nya, khi eri iJesu iKirisiti ọ bhale agbo ya tsumhi ena olamhe, ni o khia khi mhemhe mhi ga khọlo ne nya.

† **1:13** Li ze *Ika 8.3; 9.4-5*

¹⁶ Ama eri Eshinẹgba ọ mhue ilẹlemhi na mhemhe ni ọ khọlo ne ena olamhe nya, ni a ro bhale ya e khi irabomudu oniemi ni iJesu ọ mhue na mhe o khi irọkhokho shi egbo ni e ke ya mie ọli suo ọ, ali eni e ya mhue agbo na agboagbo.

¹⁷ Ekpe ali ufumhi o khi oyi Oghie na agboagbo, ni ọa ya ghu, ni aa ya me, Eshinẹgba ni ọ khi ọghuo kpe, rote agboagbo ya je agboagbo! Atse.

¹⁸ Yeye iTimoti omimhe, ena e khi omhesẹ ni mhi ro ne, ni e de shi abi a li me eke shi e egbe egheghe ni o dose. Ke ri omhesẹ ena gbe akanya, irari khi itsua-okhue e khi ne, ni u ro dobe ya khọli okhọli onete,

¹⁹ kie mu irudunga oye ali udu onete ni ọ gue ọgbo ezọ oye mhue. Egbo eghuo ni ẹa ke riele emini udu onete ni ọ gue ọgbo ezọ oye we o gueye we e riele, eri irudunga oye we o de guoghọ-a abi oko-oke oniemi.

²⁰ Egbo enabi eghoghọ iManusi ali Alẹzada e khi, ni mhi wolọ abọ na okphaghiẹ ni ọ sese we ingme, ini e khi ke ngme ungmehi ipfiunu-a deba Eshinẹgba.

2

Ugamhi igbaa oyi eni e mie iJesu iKirisiti suo

¹ Mhi gueye e, a kpe te odode so iromhi na egbo kpa. Abi u lie gue emini e to e le, lema Eshinẹgba shi ilẹlemhi na we, u kphemhi na Eshinẹgba na we.

² U li so iromhi na enighie ali eni ee mhesẹ ni awa, ni e ro dobe ke la agbo na tsuke ali opfomhe, elemhi ekpe oyi Eshinẹgba rote igue-ngeli.

³ Ona oo ti, o ma ri egbe a mu Eshinẹgba otsumhi oyawa.

⁴ Ni ọọ nono ni ọgbọkpa ọ mhọli imiepfuese, ni ọ gbo lẹsẹ igesikia.

⁵ Irari khi Ẹshinẹgba ọghuo ọ laọ, ali ọmigha iteva ọgbọ ali Ẹshinẹgba ọghuo, ọmọse ni a lu iJesu iKirisiti.

⁶ Ni ọ ri egbọli bhale shi ọtoeloli, ni ọ rọ mie egbọ nya pfuese. Ona o khi usomhi ni Ẹshinẹgba ọọ nono ni lọli gueye ọgbọkpa ni o guẹ de shi egheghe oyọli.

⁷ Ona o zẹ ni a rọ ghie mhẹ abi aghiusomhi na keẹ ni iKirisiti ọ zẹ ali ọsẹsẹ oyi iJeta ni mhi rọ gue usomhi irudunga ali igesikia le. A khi egbhue mhia lo, igesikia mhia guele.*

⁸ Ini a ye ugamhi, mhia nono ni emọse e tsua abọ eke shi iromhi isosọ ni ọa mhue elemhi ibibi wẹkhi ekhako.

⁹ Mhi lili ẹ nono ni eni ikpotso e guẹ ke sọ itsua ni e gbe akanya, a khi khue akhue abamemhe, wẹkhi ie-itsu dolodolo shi ukhomhi, wẹkhi iri-igolu khue akhue ali ifefe isosọ wẹkhi itsua ni e lolo ghale isosọ.†

¹⁰ Ama e ke gbe ikanya enete, ni o ye ni ikpotso ni ẹẹ khi wẹwẹ a ga Ẹshinẹgba ẹ gbe.

¹¹ Ikpotso e ke ri iregbe-tiemhile ke ku esọ-a wena.

¹² Mhi aa zẹ ọkpotso ni ọ sẹsẹ, wẹ khi eri ọ ya mhue omhesẹ shi emọse ukhomhi. Ọ ke tsaghie-a.

¹³ Itobọ khi Adamu a kpe ma neni a ma Ivu.‡

¹⁴ Ọa khi Adamu ọkphaghie ọ di, ama ọkpotso a di ni ọ gbe ushi oyi Ẹshinẹgba-a.§

* **2:7** Li zẹ 2 iTimo 1.11 † **2:9** Li zẹ 1 iPit 3.3 ‡ **2:13** Li zẹ Igbae 2.7,21-22 § **2:14** Li zẹ Igbae 3.1-6

¹⁵ Ama a ya tsumhi ọkpotsọ rọte eniye ibiabia, ini ọ kiele ẹ deba irudunga ali inono ali ipfuase, ni ọ rọ mu ekpe shi egbọli egbe.

3

Eni ẹ mhese elemhi igbaa oyi eni e mie ifesu iKirisiti suọ.

¹ Oni ungmehi ona oo gbe akanya gba. Ini ọgbọ ọọ nono ni lọli khi ọni ọ ri ẹloe ẹ khu ẹgbọ eyi Eshinegba, eminete lọ ni o ghọle ọli.

² Ọni ọ ri ẹloe a khu eni e miesuọ ọ mema ya khi ọgbọ ni ọ fu dọse umhaguẹli, ọ khi ọdọ ọkpotsọ ọghuo, ọ mhue ikuegbe-a, ọ mu ekpe shi egbọli egbe, ọ khi ọni a mu ekpe a na, ọ mema ya ke kpe abọ mie epfese lo apfe oyọli le, ọ mema ya dobe ke sese osese.

³ Ọkhi khi ọdonyo, we ọgbọ okhọli, ama ọ pfomhe, ọ khi khi ọgbọ uwola, ọ khi nono ingme ukpaghọ dọse.

⁴ Ọ mema khi ọni ọ guẹ ri ẹloe ẹ khu ọmhue-apfe oyọli. Ọ khi ọni imiọli e mu ekpe ẹ na, ẹẹ suọ esọ na li egbegbọ.

⁵ Itobọ khi ini ọgbọ ọa guẹ ri ẹloe ẹ khu ọmhue-apfe oyọli, se ọli ya dobe ri ẹloe khu igbaa oyi eni e mie ifesu iKirisiti suọ?

⁶ Ọkhi khi ọni ọ lese miesuọ ni ode ọa nuẹ ne ini ititiegbe e khi vọ li egbe ni ọ tigbe ya de pfilo epfua nabi ọkphaghiẹ ọ de pfilo.

⁷ Ọ mema khi ọgbọ ni ọ mhọli eva onete iteva oyi ena edato, ini ọ khi yeghe-a ni ọ de ya pfilo igha ọkphaghiẹ.*

* **3:7** Li ze iTatọ 1.6-9

⁸ Eni ẹẹ kpaghie elemhi owa ugamhi, e khi ẹgbọ ni a mu ekpe ẹ na, e khi ẹgbọ ni a ri egbe ẹ nga. E khi khi eni e da onyo ọ dose wekhi eni ẹẹ li oyamhi ukpago.

⁹ E ri udu-onete ni ọọ gue ọgbọ ẹzọ mu igesikia ni a rokhase ni e la irudunga mhue.

¹⁰ A kpe mu we fe bino, ini o khia khi e gue gbe, a tigbe ze we obọ ọ gbe akanya oni ọọ ga.

¹¹ Ighuewe e mema ya mhue ingeli enete. E khi khi eni ẹẹ le ẹgbọ itsa uruli kiakia, e mhọli ayemhe ni o pfomhe, e khi eni a ri egbe ẹ nga shi emhikpa.

¹² Omose okpagoiobo ọ mema ya khi oni ọ rue okpotso ọghuo shi, ọ khi oni ọ gue ẹ sese eniye eyoli ode, ọ gue ri ukpeloe a khu omhue-apfe oyoli.

¹³ Ekpaghie-obọ eni e gue ga, e she roli mie ashini o mu eloe, ali e dobe ri igbedu ẹ ngme ingme oyi irudunga oyi iJesu iKirisiti ni e mhue.

Osheli ni o la irudunga oyawa

¹⁴ Aboriekhia khi mhi ririe mhọli ọli shi udu khi mhi ya kele bhale ya bine, mhi ro kie keke eni omhese ena ghi ẹ. Egheghe agho ni a bhale ya ẹ khi,

¹⁵ ini o khia khi mhi tese denẹ, ebe ona o ya sese ẹ abi o ti ni ẹgbọ e li ke ngeli elemhi omhue-apfe oyi Eshinegba, ni o khi igbaa oyi eni e mie iJesu iKirisiti suo oyi Eshinegba ni ọ la agbo. Ikhi igbaa oyi eni e mie iJesu iKirisiti suo ni o khi oche ali irogbekẹ ni a ma igesikia nga.

¹⁶ Igesikia ni o la osheli oniemi ni o la irudunga oyawa o fu dose oni ọgbokhoghuo ọ mhue ekhako ẹ shi.

IJesu ọ bhale agbo abi ọgbọ,
Ayemhe ọ roli khase

khi ọ ghọle Ẹshinẹgba,
 igẹni e mẹ ọli
 A rọli tse abọ gasẹ
 ushishi nya,
 ẹgbọ e mie ọli suọ
 elemhi agbọ nya
 a rue ọli nga iloghie.

4

Ena Osese ẹgbhọli

¹ Ayemhe ọ guele gboo khi, ikpukhokho agbọ, ẹgbọ eghuo e ya tsua irudunga pfi-a. Ẹ deba iyemhe ni ẹẹ di agbọ, ẹẹ deba osese ni ayemhe ọkphaghie e tsua lasese.

² Osese eghoghọ, obọ oyi elo-ẹgbhue ena ikokoalo e te ẹ bhale, eni udu-onete ni ọ gue ọgbọ ẹzọ oyewe o she ghua dishi.

³ Ẹgbọ eghoghọ ẹ sese ẹgbọ e khi rue ọkpotoso, eni ikpotso e khi ye ughue, e gueye we e khi ke le eminale eghuo. Ama eri Ẹshinẹgba ọ ma eminale eghoghọ, eni e miesuọ ni e lese igesikia e ke ri ikphemhi mie we le.

⁴ Emhikpa ni Ẹshinẹgba ọ ma o ti, a khi mẹ emini a kie, ama a ke ri ikphemhi mie emhikpa.

⁵ Irari khi ungmehi oyi Ẹshinẹgba ali iromhi isoso a rọ rewe ẹ shi eni e pfuase.

⁶ Ini u ri oni omhesẹ ona na eni e miesuọ, u ya khi oni ọ gue gbe akanya ugamhi oyi iJesu iKirisiti, ni a kuele vule rote igesikia na irudunga ali osese enete ni u wa deba.

⁷ Khi mhọli emini u ri okhe oyi ẹgbọ neḁe, ali okhe ikpotso egbhali ẹ rieḁe. Ke ngeli rieḁe ọghuemhe oyi Ẹshinẹgba.

⁸ Inisegbe-a o mhọli ukuku eminente ni o riẹlẹ a na ọgbọ, ama ni a rọ suọ esọ na Eshinẹgba, eri o ti odekhode, itobọ khi o mhọli ishobọ na awa memena ali agbọ ni o ke ẹ bhale.

⁹ Ungmemhi igesikia na ni o ti ni a mieshi, ni a gbo lama shi ọ.

¹⁰ Onana o ri anye roshẹka a gbe akanya egbegbọ, irari khi awa she ri irudushi oyawa shi Eshinẹgba obọ, ọni ọ laọ ni ọ khi Omiepfuese ọyi ọgbọkpa, eni e miesuọ kpaashi.

¹¹ Mhẹsẹ, u gbo sẹsẹ ena nya.

¹² Khi zẹ ni ọgbọkhoghuo ọ ri ẹloe gbe ẹ irari khi ozele u khi, ama rọte ungmehi oye, ali agbọ oye, ali inono oye, elemhi irudunga ali ipfuasẹ oye khili irọkhasẹ na eni e miesuọ.

¹³ Ya ramhi eghẹghẹ ni mhi rọ ya bhale, ri ẹloe shi ọ kie ke zẹ Ebe-no-pfuasẹ khasẹ igbaa, u kie le ẹ tse-abọ oni ungmehi, wa sẹsẹ wẹ.

¹⁴ Khi ri obọ gbe isomhopfa ni Eshinẹgba ọ rọ nẹ nyẹ. Oni a rọ nẹ abi a rọ mekẹguele shi ẹ egbe ali abi eni egbhali e rọ ri abọ ngẹ egbe.

¹⁵ Ke ri ẹloe shi eni emhi ena egbegbọ, u ri egbe ẹ na wẹ pfo ni ẹgbọ nya e ke mẹ ije-odalo oye.

¹⁶ Ri ẹloe shi egbe ẹ egbe ali osesẹ oye. Kie ke riẹlẹ emhi ena, irari khi ini u wa lighọ u ya tsumhi egbe ẹ ali eni ẹ suọ ẹ.

5

Abi ẹẹ a ke li esamhi-olimhi, ali egbhali ali ighumha

¹ Khi dese ọgbhali, ri ipfomhẹ uruli nu ọli ngme abinẹ khi itẹ ọ khi. Ke riẹlẹ deba ozele abinẹ khi inyoghuo ẹ u ngeli ẹ deba.

² U riẹlẹ deba ikpotso eni egbhali abinẹ khi inye e khi. Ke ngeli deba ozele ikpotso abi inyoghue ni ikpotso.

³ Khi ri ẹloe gbe esamhi-olimhi ni e khi esamhi-olimhi egbegbo, ni e mhọli ọtomhẹ.

⁴ Ini ọni ọsamhi-olimhi ọ bia eniye, o ke khia khi ọ mhue imimi, eni eniye e kpe ke ri emini e wena imiesuo gbe akanya, abi e li ri ẹloe ẹ khu omhue-apfe oyewe. Ini e lina, eri ẹ fele eni e bia we ali itita we egho, irari khi onana o ma ri egbe a mu Eshinegba.

⁵ Ọni ọ khi ọsamhi-olimhi igesikia ni ọa ke ye ughue, ni lolighuo ọ la, ọ she regbenga Eshinegba, ọ so iromhi ẹ mhila li ikpaghiobo obo, ẹleogwota ali ẹle iyose.

⁶ Ama ọsamhi-olimhi ni ọ ri egboli shi aruele agbo, ọ she ghu-a ini ayemhẹ oyoli o kie tseku lao.

⁷ Mhesẹ enana na we ini a khi me gue shi we egbe.

⁸ Irari khi ini ogbo ọa ri ukpeloe khu ena omhue-apfe oyoli, tete imi ọli ali ughue ọli, ọ she kie oni irudunga. Ọ kholo dose ọni ọa miesuo.

⁹ Khi keke eva oyi ọsamhi olimhi kuma eva eyi esamhi-olimhi se ni ọ she dose ikpe egbhuse, ọni o khia khi utoghuo-kpe ọ kpe lese ye ughue.

¹⁰ Ọ khi ọni a suo eko shi ikanya enete, ọkpotso ni ọ gue kuẹle imioli. Ni ọ mie epfese ẹ shi owa. Ọ gue a gbe ikanya deba eni e miesuo, ni ọo kpaghie egbo ni e la omunu obo ni o ri egboli shi onete ododa iriele.

¹¹ Ama khi ri eva oyi ozele esamhi-olimhi shi ebe. Irari khi ini ọghuẹmhe idiegbe oyewe o nga we ukhomhi le dose ugamhi ni e ga iKirisiti, e vu ya ngeli.

¹² Eri e rote agho lue, irari khi e she gbe ironga ni e kpe te eke ro nga ni iKirisiti-a.

¹³ Egbọ owaza e khi ni ee kia ifui owa. Oni o kholo ne nya khi ee le egbo itsa uruli kia kia, ee soro unu ingme ni aa fe lu we shi, ee ngme ungmehi ni ea kha ngme.

¹⁴ Itobo igho, o ghole mhe ni ozele isamhi olimhi e ye ughue, e bia eniye, e ri eloe e khu omhue-apfe oyewe. Ini awa khi ri eghẹghẹ na ebe awa me asha yese awa eva-a.

¹⁵ Eni esamhi-olimhi eghuo e she lase ode oyi iKirisiti le deba okphaghe.

¹⁶ Ama ini okpotso okhoghuo ni o miesuo o mhue osamhi-olimhi she unuekpe oyoli, o mema ya ke ri eloe khu oli, o khi rue oli ghi igbaa oyi eni e mie iJesu iKirisiti suo ke tsua, ni e dobe ri eloe ke khu eni e khi egbegbi esamhi-olimhi ni e mholi otomhe.

¹⁷ A ke fali eni egbhali ni e ri igbaa oyi eni e mie iJesu iKirisiti suo e kia ni e guẹ gbe akanya egbegbo ifata agbhagbhamhi eva, tete eni e mema lolo toto obo itse-abo ali osese ungmehi oyi Eshinegba.

¹⁸ Irari khi ebe o ngme oli, u khi ge ena unu ini u roli e kpishi ikpamhi emhi. A ke fali egbakanya ifata eyewe.*

¹⁹ Khi roli shi egbegbi ingme ini ogboghuo a bhale ya ngme ingme shi ogbhali egbe, se ini e gbe aava

* **5:18** Li ze iDeut 25.4; iMat 10.10; iLuk 10.7

okekhi aase.†

²⁰ La odalo ẹgbọ kpa ke dese eni e lamhẹ ni o tse agua ye enekpọle.

²¹ Mhi la ukpẹloẹ onayi Ẹshinẹgba ali iJesu iKirisiti ali oyi igeni ni e pfuase mhese ne, u ri omhese ena gbe akanya, khi rote ode oshili we ẹ azeba riẹle emhikhoghuo.

²² Khi tigbe kele ri obọ nga ọgbọ egbe roli nga akanya ugamhi oyi Onomhue, u khi ya nu ọli mhue okemhi shi olamhe oyi ọli. Ri egbe e shi ipfuase.

²³ Khi ke da amẹ tsee, ama ke da ukuku onyo ni eminale e kele ke daghie-a shi e elemhi, abi o ro khia khi u ma kele e ghua egho.

²⁴ Eri a ga ẹgbọ eghuo zu olamhe eyewe, neni a re ramhi iguezo, ama olamhe oye ẹgbọese elelese e ya lasale.

²⁵ Igho a lie me ikanya enete gboo. Shi eghuo ni aa ya me memena, ẹa ya sheli okhese.

6

¹ Eni e khi ighumha e ke ri ekpe na ega eyewe eghẹghẹkpa ini ọgbọkhoghuo o khi ze emube na eva oyi Ẹshinẹgba ali osese oyawa.

² Ighumha e khi ri ẹloẹ gbe ega eyewe ni e miesuo, ni e mholi we, irari khi inyoghuo egbe e ga khi ni ee deba iKirisiti, oni iKirisiti o nono ingme oyewe. Ochoghọ e ke ga we dose abi e kpe li a ga we, Eni ingme ena e khi eni u ya ke sese we, u gbo rewe e ye we ude.

³ Ogbọ ni o da sese osese olese ne, ọa lama shi egbegbi osese oyi iJesu iKirisiti Onomhue oyawa ali ugamhi oyawa,

† 5:19 Li ze iDeut 17.6; 19.15

⁴ eri itipfuabọ-nga o she vọ li egbe ni ọa ke lẹsẹ emhikhọghuo. Ọ mhue ọghuemhẹ obe na ekhako ali uwola shi ingmemhi ni ẹẹ pfi ofuma ali uwola ali itsue ali ireloevioḅa.

⁵ E gbolo ẹ pfi ekhako shi iteva ẹgbọ ni isamhi udu oyewẹ ọa ya gbe akanya te ode, ni igesikia o she wa wẹ-a. Eri ẹ dabi khi ugamhi khi ẹpfue a roli ẹ nono.

⁶ Egbegbo lo khi ugamhi o ri ọgbọ ọ mhue ẹpfue egbegbo, o ri emini u mhue khuese ẹ.

⁷ Irari khi awa a kpe tsua emhikhọghuo bhale agbo ona. Igho awa a li rote agbo ya tsua emhikhọghuo vu.

⁸ Irari onana, ini awa da mhue eminale ali itsua na so ne, o khuese awa.

⁹ Ama eni ẹ nono ni wewẹ e pfue eri ẹẹ de pfilo imufe ali igha ali ọghuemhẹ eyi oyeghe ni ẹ kuale ọgbọ utse, ni o pfi ẹgbọ pfilo epfua ali oyese.

¹⁰ Irari khi rote oyamhi ukpaghọ iwali onobe nya e te ẹ zẹ lasele. Ẹgbọ eghuo e she kphakpha egbe ini e mhue ikpaghọ, ni o she rewẹ kia lase ode irudunga le. E she ri ebubu oya yese egbe wẹ udu-a.

Agbo ni o ti ni oni o miesuo o la

¹¹ Ama yeye Omose oyi Eshinẹgba, ti egbe emhi enana nya le, na ke khu ipfuaṣe, ali iriele emini o ti Eshinẹgba eloe, ali irudunga, ali inono, iregbemie ali angeli ipfomhe.

¹² Ga ri itoto eye nya na unamhi oni irudunga oye, ni u mie eleli agbo na agboagbo. Itobo khi oni agbo onana Eshinẹgba o lu ẹ shi abi u ro pfi otsele shi irudunga oye odalo ebubu ẹgbọ.

13 Odalo oyi Eshinẹgba ni ọ ri agbọ na emhi nya ali odalo oyi iJesu iKirisiti, ni ọ pfi ọtsele odalo iPotiusi iPaleti, mhi la mhẹse ne ena,*

14 u ri omhẹse enana gbe akanya, ri igesikia mu we mhue gbaa ya ramhi ele ni iJesu iKirisiti Onomhuele oyawa ọ ro ya bhale.

15 Oni ibhale oyoli o ya tse shi eghẹghẹ ni Eshinẹgba ọ mhẹse ọli shi te, loli ọ khi Oghie ọghuo kpele ni a khivose na, Oghie oyi ighie nya, ali Onomhuele oyi ekhemhuele nya.

16 Lolighuo kpele ọ lese la ọ le agbọagbọ. Eri ọ la akpa ni ọgbokhoghuo ọa gbudu a ti mama. Oni ọgbokhoghuo ọa me ghue wekhi eri ọgbọ tigbe dobe ya me ọli ghue. A ri ufumhi ali ekpabo oniemi nali. Atse.

17 Mhẹse na egbọ ni e pfue shi elemhi agbọ ona, e khi ke ti-ipfuabo nga, a e khi ri udu shi epfue ni ẹa ze ri egbe ẹ da, ama e mhue irudushi na Eshinẹgba ni ọ ri emhikpa somhi awa opfa tuo, awa ro ke li agbọ.

18 Mhẹse na we e ke riele onete, e khili eni e pfue shi elemhi onete iriele, e ke somhi egbọ opfa, e ke rote emini e mhue rue obo-a.

19 Ini e da li na ne, e ya ti epfue ma na egbewe abi irogbekẹ ni o migha, elemhi agbọ ni ọo bhale, ni e la agbọ ni Eshinẹgba ọ nono ni e la.

20 ITimoti, ri eloe khu emini a ro shi e obo. Khi kuma ingmemhi ni ẹa khi eyi Eshinẹgba ali ekhako eyeghe ni egbọ eghuo e ri egholi ẹ lu ilese,

21 ni egbọ eghuo e deba ni o rewe lase ode irudunga oyewe le.

* 6:13 Li ze iJon 18.37

Okhale oyi Ẹshinẹgba o ka nu ẹẹ nya la.

Ebe-No-Pfuasę Ishobo Onogbo
New Testament in Ivbie North-Okpela-Arhe
(NI:atg:Ivbie North-Okpela-Arhe)

copyright © 2012 Wycliffe Bible Translators, Inc.

Language: Ivbie North-Okpela-Arhe

Translation by: Wycliffe Bible Translators, Inc.

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789194797

The New Testament

in Ivbie North-Okpela-Arhe

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 18 Apr 2025 from source files
dated 29 Jan 2022

03be06b0-68fd-500b-b9a9-6bca4b63979a